

## Tengku Eddie antara lima lelaki didakwa cederakan pekerja di kandang kuda

Oleh NORHAFIZAN ZULKIFLI | 7 November 2024, 1:45 pm



Tengku Eddie Akasya mengenakan penutup muka bersama empat lelaki mengaku tidak bersalah cederakan seorang lelaki ketika dihadapkan ke Mahkamah Majistret Kuantan.

KUANTAN – Seorang kerabat Pahang antara lima lelaki yang dihadapkan ke Mahkamah Majistret Kuantan, di sini hari ini atas pertuduhan mencederakan seorang lelaki menggunakan pisau Jun lalu.

Tertuduh, Tengku Eddie Akasya Tengku Abd Rahman, 20, dan empat yang lain iaitu Nik Norisham Affendi NiK Mohd Zani, 39; Mohd Fouzi Md Nur, 44; Mohd Taufik Daud, 32; dan Khairul Azhar Rosli, 38, mengaku tidak bersalah ketika pertuduhan dibacakan di hadapan Majistret Raja Norshuzianna Shakila Raja Mamat.

Mengikut kertas pertuduhan, kesemua tertuduh dituduh secara bersama dengan sengaja telah menyebabkan kecederaan di bahagian paha kanan mangsa.

Kesemua mereka didakwa melakukan kesalahan terbabit di kawasan lot tanah bangsal kuda di Jalan Teluk Sisek, di sini, dalam kejadian pada pukul 12.20 tengah malam 6 Jun lalu.

Kesemua tertuduh didakwa melakukan kesalahan di bawah Seksyen 324 Kanun Keseksaan dibaca bersama Seksyen 34 Kanun Keseksaan yang boleh membawa kepada hukuman penjara selama tempoh maksimum 10 tahun atau dengan denda atau dengan sebat atau dengan mana-mana dua daripada hukuman itu.

Pendakwaan dikendalikan oleh Pengarah Pendakwa Negeri, Sharizat Ismail, Noor Aishah Mohd Amin dan Deevagaran Naidu Baskaran.

Empat tertuduh masing-masing diwakili empat peguam yang diketuai peguam Y. Sheelan Samugam manakala seorang tertuduh yang merupakan anggota polis diwakili peguam Mohamed Badruzzaman Abu Bakar.

Mahkamah menetapkan wang jaminan RM7,000 setiap seorang di samping kesemua tertuduh perlu melaporkan diri setiap bulan ke Ibu Pejabat Polis Daerah (IPD) serta tidak dibenarkan mengacau ganggu mangsa.

Mahkamah kemudiannya menetapkan 11 Disember hadapan sebagai tarikh sebutan semula kes.

Terdahulu media melaporkan seorang pekerja pembinaan, Alias Awang, 44, mendakwa dirinya dipukul dan diserang menggunakan pisau serta pistol oleh sekumpulan lelaki termasuk membabitkan seorang kerabat diraja Pahang dalam kejadian di sebuah kandang kuda di sini, Jun lalu sehingga mendapat perhatian Tengku Mahkota Pahang, Tengku Hassan Ibrahim Alam Shah yang kemudiannya menitahkan agar polis menyiasat kes tersebut dengan segera, telus, adil dan tegas tanpa kompromi mana-mana pihak.